



Sora Mengia da Glion

■ (anr/abc) Numerusas mattas, dunnas ed era umens ein stai a scola tier ella ni han frequentau cuors da cuschinar. Dumengia proxima ei fiasta gronda en claustra a Glion. La cuminonza dallas soras dominicanas festivescha il giubileum da profess da 14 consoras. Ina da quellas ei sora *Mengia Bundi*. Ella ha fatg il profess ils 8 da settember 1969. Quei gi ha Cristina Bundi, la matta da 24 onns da Breil, midau la veta profana culla veta claustrala. Ella fuvva fiug e flomma pil puresser, siu fervent giavisch fussi stau da darentar pura. Ell'ei darentada scolasta, scolasta da puras. Ed ella ha oz schizun ina tuorta ch'ei enconuschenta cul num «tuorta Mengia».